

6. sjednica Parlamentarnog foruma za evropske integracije Bosne i Hercegovine

5. februar 2016. godine, Banja Luka

ZAJEDNIČKA IZJAVA

Po završetku 6. sjednice Parlamentarnog foruma za evropske integracije Bosne i Hercegovine, a u skladu s članom 5. Pravila rada Parlamentarnog foruma za evropske integracije Bosne i Hercegovine, članovi kolegija Parlamentarnog foruma:

1. Izražavaju zadovoljstvo potpisanim konceptom mehanizma saradnje parlamenata u Bosni i Hercegovini u poslovima vezanim za proces integracija u Evropsku uniju. Saglasni su da potpisivanje ovog dokumenta predstavlja jasnu opredijeljenost i spremnost sva četiri parlamenta u BiH da međusobnom saradnjom na četiri nivoa (konferencija predsjedavajućih/predsjednika domova/parlamenata u BiH; Parlamentarni forum za evropske integracije Bosne i Hercegovine; saradnja sektorskih radnih tijela; administrativna saradnja i redovna koordinacija aktivnosti vezanih za Evropsku uniju) olakšaju realizaciju zajedničkih ciljeva u procesu evropskih integracija. U vezi s tim, izražavaju zahvalnost Evropskoj uniji na provođenju dvogodišnjeg Twinning projekta pod nazivom „Jačanje uloge parlamenata u BiH u kontekstu integracija u Evropsku uniju“, koji je finansiran iz IPA fondova Evropske unije;
2. Pozdravljaju odluku Predsjedništva Bosne i Hercegovine za skoro podnošenje aplikacije za članstvo u Evropskoj uniji, te u vezi s tim izražavaju saglasnost da taj korak predstavlja spremnost Bosne i Hercegovine za početak novog poglavlja u procesu evropskih integracija i jasnu opredijeljenost za članstvo u Uniji;
3. Podržavaju aktivnosti institucija izvršnih vlasti u Bosni i Hercegovini na provođenju akcionih planova za realizaciju Reformske agende i pozivaju one institucije koje do sada nisu izradile te dokumente da to urade i otpočnu njihovo provođenje što je moguće prije;
4. U kontekstu mogućnosti i važnosti korištenja sredstava u okviru IPA II fondova Evropske unije, pozdravljaju sve do sada preduzete korake u tom smislu; u vezi s tim pozivaju nadležne institucije u Bosni i Hercegovini na svim nivoima na provođenje aktivnosti s ciljem informiranja šire javnosti o mogućnosti korištenja sredstava iz spomenutih fondova;
5. Pozdravljaju odluku Zajedničke komisije za evropske integracije Parlamentarne skupštine Bosne i Hercegovine u vezi s organiziranjem okruglih stolova u općinama i gradovima širom Bosne i Hercegovine o aktuelnim temama koje se tiču procesa integracija u Evropsku uniju, a u svjetlu stupanja na snagu Sporazuma o stabilizaciji i pridruživanju, te izražavaju saglasnost s tim da budu aktivni učesnici spomenutih događaja.
6. Pozdravljaju aktivnosti Parlamentarne skupštine BiH koja je prva konstituirala zajedničko tijelo s Evropskom unijom u obliku Parlamentarnog odbora za stabilizaciju

i pridruživanje na osnovu Sporazuma o stabilizaciji i pridruživanju; izražavaju žaljenje zbog nepostizanja kompromisa o sadržaju Poslovnika o radu Parlamentarnog odbora za stabilizaciju i pridruživanje između Parlamentarne skupštine BiH i Evropskog parlamenta, te pozivaju na usaglašavanje teksta Poslovnika kako bi se dijalog s Evropskim parlamentom nastavio u punom intenzitetu;

7. Povodom prvog sastanka Vijeća za stabilizaciju i pridruživanje i prvog sastanka Odbora za stabilizaciju i pridruživanje između Evropske unije i Bosne i Hercegovine, formiranih na osnovu Sporazuma o stabilizaciji i pridruživanju, održanih u decembru 2015. godine u Briselu, pozdravljaju ove događaje, koji su ujedno označili i početak provođenja Sporazuma o stabilizaciji i pridruživanju za izvršnu vlast na političkom i tehničkom nivou.